

**PEMBERITAHU PERTANYAAN DEWAN RAKYAT**

**PERTANYAAN : LISAN**

**DARIPADA : TUAN OSCAR LING CHAI YEW [ SIBU ]**

**TARIKH : 16.3.2017**

**SOALAN :**

**Tuan Oscar Ling Chai Yew [ SibU ]** minta **MENTERI PENDIDIKAN** menyatakan sebab 210 guru interim akan dihentikan jawatan mereka pada Mac. Adakah ini bercanggah dengan perjanjian autonomi pendidikan yang disetujui oleh Bekas Ketua Menteri Sarawak, Tan Sri Adenan Satem dan Perdana Menteri. Nyatakan bilangan guru Semenanjung yang dipindah untuk mengisi kekosongan pada tahun 2015, 2016 dan 2017, dan jelaskan bilangan guru agama.

**JAWAPAN**

Tuan Yang di-Pertua,

Untuk makluman Ahli Yang Berhormat, perkhidmatan 210 guru interim di Sarawak tidak dilanjutkan selepas Mac 2017 disebabkan mereka tidak lulus temuduga Suruhanjaya Perkhidmatan Pelajaran (SPP) atau tidak hadir temuduga SPP. Langkah ini tidak bercanggah dengan perjanjian autonomi pendidikan kerana SPP adalah badan yang mengawal kualiti Pegawai Perkhidmatan Pendidikan. Kementerian Pendidikan Malaysia (KPM) juga mengambil berat tentang pengisian kekosongan guru-guru dengan memastikan hanya guru yang cemerlang dan berkualiti diserap masuk sebagai guru tetap di dalam Perkhidmatan Pendidikan.

Walau bagaimanapun, peluang bagi menghadiri temuduga kali kedua akan diberikan kepada guru-guru interim yang ditempatkan di sekolah menengah di negeri Sarawak yang gagal temu duga kali pertama dengan memberikan pelanjutan kepada tempoh perkhidmatan interim mereka.

Manakala bagi perpindahan guru dari Sarawak ke Semenanjung, KPM telah meluluskan pertukaran sebanyak 668 orang guru pada tahun 2015 dan sebanyak 1,701 orang guru pada tahun 2016. Ini menjadikan jumlah guru dari Sarawak yang diluluskan perpindahan ke Semenanjung bagi tempoh dua tahun tersebut ialah 2,369. Daripada jumlah tersebut, seramai 233 orang guru agama dipindahkan.